

## अथ षोडशोऽध्यायः

सोळ्हमाँ दैवी अर आसुरी प्रव्रित्ती अब्द्रयाय

श्रीभगवानुवाच

अभयं सत्त्वसंशुद्धिर्ज्ञान-योगव्यवस्थितिः ।

दानं दमश्च यज्ञश्च, स्वाध्यायस्तप आर्जवम् ॥ १

स्रीभगुवान् बोले

(दैवी गुण छब्बीस मनुख के)

१आच्छै काम्माँ कै करणै मैं, आणै आळे खतर्याँ मैं ।  
मन मैं डर नाँ, हो निर्भयता, २सोच समझ मैं, ब्यौहाराँ मैं ॥  
निर्मळ बुद्धी, छळ नाँ करणा, ३ग्यानप्राप्ति अर मन पै काबू ।  
इन मैं निस्था गहरी रखणा, ४जघाँ, बखत अर पात्तर, सब नै ॥  
आष्णी क्खमता और जरूरत, सोच समझ कै उचित रूप मैं ।  
जीवनसाधन देणा दिल तै, ५करम ग्यान के बिसयाँ मैं अर ॥  
मन घोड़ै नै कस कै रखणा, ६ग्यान प्रकासी, सुभ सत्कर्मी ।  
देवाँ का अर देव जिस्याँ का, पूजन अर्चन मान बढ़ाणा ॥  
जड़ अर चेतन साधन आष्णै, खुद कै अर जन जन कै हित मैं ।  
७आष्णी रुचि अर ग्यानविधा की, पोत्थी पढणा, ग्यान कमाणा ॥  
८संयम बुद्धी रख कै तन-मन, दोत्रूँ के कस्टाँ नै सहणा ।  
तात्ती सीळी बाळ जगत् की, सह कै तपणा कुन्दन होणा ।  
९ओर सरलता बाणी मन की, ब्योहाराँ मैं बी साद्वापण हो ॥ १

अहिंसा सत्यमक्रोधस्त्यागः शान्तिरपैशुनम् ।

दया भूतेष्वलोलुप्त्वं मार्दवं ह्रीरचापलम् ॥ २

१०तन तै, मन तै, वाणी तै बी, पीड़ा प्राणी नै नाँ देणा ।

११सै जो बात जिसी, वा कहणा, १२क्रोध न करणा, १३त्याग भावना ॥

१४मन की सान्ती, १५नहीं किसै के, छिद्र उजागर करणा चुगली ।

१६कस्ट पड्याँ पै, दीन दुखी पै, किरपा करणा कस्ट मिटा कै ॥

१०लालच लोभ नहीं ए करणा, ११नरमी हो ब्योहार वचन मैं।

१२गलत काम तैं रोक्कण आळी, लोकलाज हो सरम, हया हो।

१३चेस्टा व्यर्थ न चञ्चलता हो, निचला बैट्टै, सान्त रहै ॥ २

तेजः क्षमा धृतिः शौचमद्रोहो नातिमानिता।

भवन्ति संपदं दैवीमभिजातस्य भारत ॥ ३

१४मन मैं स्वाभाविक बळ जिस तैं, कोए ओर दबा नाँ पावै।

१५बुरा करणियै अपकारी पै, क्रोध न करणा, उस नै सहणा ॥

१६धीरज, थ्यावस, १७तन मैं मन मैं, ब्योहारों मैं हो सुच्चापण।

१८आणौ जन तैं, उपकारी तैं, नाँ उल्टा चाल्लै, द्रोह करै ॥

१९खुद नै मात्रै कदे बडा नाँ, गुण ये छब्बिस हौं सैं उस के।

देवाँ के, आनन्द ग्यान के, गुण ले कैँ जो उत्पन अर्जन ॥

दिव्य गुणाँ की सम्पत्ती या, स्रेष्ठ भरत के बंसज अर्जन।

देख, भला, सै तेरै मैं के? ॥ ३

दम्भो दर्पोऽभिमानश्च, क्रोधः पारुष्यमेव च।

अज्ञानं चाभिजातस्य, पार्थ संपदमासुरीम् ॥ ४

(असुर सुभा के छह लक्खण)

१०हौंग, दिखावा 'सै', 'नाँ सै' का, ११तन-धन-जन-बळ-विद्या-कारण।

फूल्ल्या माणस इतरावै अर, १२मत्तैं कोण भला सै बढ कैँ ॥

खुद नै अतिपूज्य, बडा समझै, १३गुस्सा, जिस तैं माणस होवै।

आणौ आप्पै तैं वो बाहर, १४बोली-चाल्ली ब्योहारों मैं ॥

लहूक्खापण हो निस्तुरता अर, १५नाँ-समझी हो, कुछ नाँ समझै।

छह ये त्रिती, खोट सुभा के, होवैं उन मैं, असुर प्रव्रिती ॥

ले कैँ जलमैं देह गेह मैं, रमड़े आणौ आप्ण्याँ मैं ए।

सुख के भोगी 'मैं', 'मम'ता के, भावाँ मैं धँस आणौ आगौ।

किमे किसै नै नाँ ए गिणदे, असुरसुभावी हौं वैं माणस ॥ ४

दैवी संपद्विमोक्षाय, निबन्धायासुरी मता।

(देव, असुर सुभावाँ का फळ)

'देव' प्रकासित ग्यान सुभा तैं, ग्यान्नी माणस तत्त्व समझदे।

तेर-मेर मैं रहँदे नाँ जो, देखैं सब मैं एक च्याँनणा ॥

उन की सै जो, उन तैं आई, देव बणावै, उन मैं ले ज्या।

उन के गुण सैं 'दैवी सम्पद्', दैवी सम्पद् मुक्ति करावै ॥

जितणे ओर जिसे गुण हौं सैं, उतणे ओर उसे बन्धन तैं।

छूट्टै माणस उतणा सुख पा, आगौ बढदा तोड़ जगत् के ॥

बन्धन सारे परम ततव मैं, रळदा मर कैँ, जा कैँ इत तैं।

जग मैं बान्द्धै असुरप्रव्रिती, ग्यान्नी सारे मात्रै या सैं ॥

मा शुचः संपदं दैवीमभिजातोऽसि पाण्डव ॥ ५

मतन्याँ सोच करै तैं अर्जन, देवगुणाँ नै ले कैँ पैदा।

होया सै तैं पाण्डू के सुत ॥ ५

द्वौ भूतसर्गौ लोकेऽस्मिन्, दैव आसुर एव च।

दैवो विस्तरशः प्रोक्त, आसुरं पार्थ मे शृणु ॥ ६

(दो तहाँ की त्रिती जगत् मैं)

दो तहियाँ की सब भूत्ताँ की, सिस्टी सै इस दुनियाँ मैं या।

१०देवगुणाँ तैं घणी भरी अर, ११तन मन अर इन नै सुख देन्दे ॥

जड़, चेतन की ममता मैं बँध, पड़े जण्याँ की सिस्टी दूजी।

१२देवगुणाँ तैं भरी-पुरी या, खोल्ह-खोल्ह कैँ सै बतलाई ॥

१३असुर प्रव्रिती आळी सिस्टी, दुनियाँ मैं से फैली भोत्तै।

पहले बान्द्धै प्राण धारदै, तन मैं अर उस नै सुख देन्दे ॥

जड़ अर चेतन भौतिक सब मैं, ममता फन्दा मजबूत बणा।

उस नै पार्थ, पिरथा के सुत, अर्जन, मेरै तैं तैं सुण ले ॥ ६

प्रवृत्तिं च निवृत्तिं च, जना न विदुरासुराः।

न शौचं नापि चाचारो, न सत्यं तेषु विद्यते ॥ ७

(असुर प्रव्रिती के लच्छण)

१०जिस तैं धारण सिस्टी का हो, उस कर्तब मैं सही प्रव्रिती।

११इस तैं उल्टी हानि जगत् की, हो नाँ जिस तैं, सही निव्रिती ॥

के सै करणा, के नाँ करणा, जिस तँ होवै भला घण्यँ का।  
 ये नाँ जाणै असुर भाव मैँ, रहँदे माणस स्वार्थपरायण॥  
 नाँ सुद्धी तन मन वाणी की, बाह्य भीतरी, उन मैँ हो सै।  
 रहणी, करणी, बोली, चाली, आचार सही नाँ उन मैँ हो सै।  
 ओर सचाई उन मैँ नाँ हो॥ ७

असत्यमप्रतिष्ठं ते, जगदाहुरनीश्वरम्।  
 अपरस्परसंभूतं, किमन्यत् कामहेतुकम्॥ ८

‘सत्य जगत् मैँ नाँ चालै, धर्म-अधर्म न किम्मे होवै।  
 जिस पै इस नै टिकदा मानाँ, नाँ ए इस का सासक माल्लक॥  
 नहीं चलाणै आळा कोए, बिना रुकावट नित्य निरन्तर।  
 अपर बणै सै कारण पर का, कारण कारज इक-दूजै के॥  
 ओर किमे के इस का कारण? ‘जग का कारण चाह बढण की।  
 आपै आप बढै सै खुद तँ, ओर कहाँ के, बिसै बासना।  
 चाहत हो सै जग का कारण॥ ८

एतां दृष्टिमवष्टभ्य, नष्टात्मानोऽल्पबुद्धयः।

प्रभवन्त्युग्रकर्माणः, क्षयाय जगतोऽहिताः॥ ९

या इस दुनियाँ नै देक्खण की, नजर बणा कैँ समझै आणी।  
 रस्ता भटव्यै आपै आळे, घाट समझ अर राक्खण आळे॥  
 पैदा हौँ सै क्रूर करम कर, नाँस करण नै दुनियाँ का वैँ।  
 गलत राह पै चाल, चला कैँ, बुरा करैँ सै दुनियाँ का वैँ॥ ९

काममाश्रित्य दुष्पूरं, दम्भमानमदान्विताः।

मोहाद् गृहीत्वाऽसद्ग्राहान्, प्रवर्तन्तेऽशुचिब्रताः॥ १०

उस चाहत का ले कैँ आस्रै, मुस्कल जिस नै पूरा करणा।  
 ढोंग दिखावा हङ्कार नसा, जन धन कुळ बळ ग्यान जात का॥  
 इन तँ जो सैँ भरे गळै तक, मोह भरम अर नाँ-समझी तँ।  
 दुनियाँ कैँ रहणै मैँ बाधक, हठ ले पकड़े मूरखता तँ॥  
 करम करैँ सैँ लक्स्य मलिन रख, माहोल बिगाड़न आळे ले।

नेम धरम वैँ ठाणैँ मन मैँ॥ १०

चिन्तामपरिमेयां च, प्रलयान्तामुपाश्रिताः।

कामोपभोगपरमा, एतावदिति निश्चिताः॥ ११

‘साधन ईब जुटाणे ये सैँ, ये सैँ साधन मेरैँ धोरैँ।  
 रच्छा इन की किस तहियाँ हो’, चिन्त्या या, जिस की नाँ कोए॥  
 माप तोल, गिणती, थाह तथा, सम्भव हो सैँ परळैँ ताईँ।  
 ले कैँ आस्रैँ उस का बैट्टे, जिन की इच्छा बणी रहैँ सैँ॥  
 उन भोगगाँ मैँ लागे रहँदे, इतणा ए सैँ लक्स्य जीण का।  
 ‘ये नाँ हौँ तो, के सैँ जीणा?’, इस निस्चैँ पै टिक कैँ रहँदे॥ ११

आशापाशशतैर्बद्धाः, कामक्रोधपरायणाः।

ईहन्ते कामभोगार्थमन्यायेनार्थसंचयान्॥ १२

‘होगा न्युँ यो’, ‘वो न्युँ होगा’, आस रखैँ न्युँ सैँ माणस।  
 फन्दे इन के गेरैँ गळ मैँ, बँध कैँ रहँदे खुद तँ माणस॥  
 चाहत गुस्सैँ कैँ बस होए, इच्छा कैँ सँग पैदा माणस।  
 पूरी जै त्रिस्णा, लोभ बणैँ, हो नाँ चाहत जै वा पूरी॥  
 आग-बबूळा होवैँ माणस, बेबस उन कैँ आगैँ हौँ सैँ।  
 चाहैँ अर वैँ करैँ जतन सौँ, मनभान्दे भोगगाँ की खात्तर।  
 बे-इंसाफी, बे-ईमानी, कर साधन-अम्बार जुटावैँ॥ १२

इदमद्य मया लब्धमिमं प्राप्स्ये मनोरथम्।

इदमस्तीदमपि मे, भविष्यति पुनर्धनम्॥ १३

यो सैँ आज कमाया मत्रैँ, यो पाऊँगा मन मैँ सोच्या।  
 यो सैँ इब अर मेरैँ धोरैँ, होगा आगैँ ओर जतन कर॥ १३

असौ मया हतः शत्रुर्, हनिष्ये चापरानपि।

ईश्वरोऽहमहं भोगी, सिद्धोऽहं बलवान् सुखी॥ १४

वो सैँ मत्रैँ मार्या दुस्मन, मारूँगा अर ओराँ नै बी।  
 इतणी दोल्लत, नोक्कर-चाक्कर, हुकम चलाऊँ इन पै मैँ सुँ॥  
 मैँ सुँ भोगगी, भोग करण के, साधन सारे मेरैँ धोरैँ।

मैं सूँ सिद्ध, जिसा मैं चाहूँ, पूरी हो वो आप्णै आप्णै।  
मैं सूँ ताकतवर सब तहियाँ, भोत सुखी तन मन जन धन तैं ॥ १४

आढ्योऽभिजनवानस्मि, कोऽन्योऽस्ति सदृशो मया।

यक्ष्ये दास्यामि मोदिष्य, इत्यज्ञानविमोहिताः ॥ १५

दोलतमन्द, रहीस, धनी मैं, खान्दानी, मैं, मेरै बरगा।  
कोण ओर सै, यग्य करूँगा, दान करूँगा, आनँद ल्यूँगा।

अग्यान मोह तैं, न्यूँ वैं भरमे ॥ १५

अनेकचित्तविभ्रान्ता, मोहजालसमावृताः।

प्रसक्ताः कामभोगेषु, पतन्ति नरकेऽशुचौ ॥ १६

कई तह्याँ की चित की भ्रान्ति, मोहजाळ मैं फँसे बँधे वैं।  
गळ तई डूब्बे बिसैभोग मैं, पड़दे नरकाँ गन्ध्याँ मैं सैं ॥ १६

आत्मसंभाविताः स्तब्धा, धनमानमदान्विताः।

यजन्ते नामयज्ञस्ते, दम्भेनाविधिपूर्वकम् ॥ १७

खुदै खुद नै बडा मानदे, अकडू, आप्णी धन अर दोल्लत।  
इज्जत सोहरत मान बड़ाई, घणै नसै मैं इन कै रहँदे ॥  
देव पूजदे पूजा-पाट्टी, जस की खात्तर, नामकरण नै।  
नाममात्र के यग्याँ तैं वैं, करैं दिखावा बिना बिधी कै ॥ १७

अहंकारं बलं दर्पं, कामं क्रोधं च संश्रिताः।

मामात्मपरदेहेषु, प्रद्विषन्तोऽभ्यसूयकाः ॥ १८

न्यूँ वैं आप्णा जीवण जीवैं, 'मैं' 'मैं' करदे तन मन धन जन।  
इन की ताकत आप्णी समझैं, घोर घमण्डी, बिसैभोग की ॥  
इच्छा पै अर गुस्सै मैं वैं, टिके सदा ए रहँदे माणस।  
आप्णै ओर परायै तन मैं, बैट्टै मत्तैं द्वेस करैं सैं।  
दुनियाँ भर मैं खोट काढदे, आच्छै मैं बी खाम्मी खोज्जैं ॥ १८

तानहं द्विषतः क्रूरान्, संसारेषु नराधमान्।

क्षिपाम्यजस्रमशुभानासुरीष्वेव योनिषु ॥ १९

खुद नै, खुद के बन्द्याँ नै तज, ओर सबै तैं द्वेस करणिये।  
मार-काट मैं, कस्ट देण मैं, लागे रहँदे करडै मन के ॥

मनुखाँ मैं जो नीच सुभावी, असुभ अमङ्गल करैं निरन्तर।  
उन नै मैं इन संसाराँ मैं, सही तह्याँ तैं नेम धरम तैं ॥  
चाल्लण आळी इस दुनियाँ मैं, काया माया मैं खुस रहँदी।

जूणाँ मैं सूँ गेरूँ अर्जन ॥ १९

आसुरीं योनिमापन्ना, मूढा जन्मनि जन्मनि।

मामप्राप्यैव कौन्तेय, ततो यान्त्यधमां गतिम् ॥ २०

असुर भाव की, तन मन धन की, आप्णै हित की, आप्णै सुख की।  
सोच्चण आळी, उस मैं रमड़ी, इसी जूण मैं पड़े मोह मैं ॥  
पड़े भरम मैं जलम-जलम मैं, मत्रै नाँ ए पा कैँ अर्जन।  
उस तैं जाँ वैं नीच जूण मैं ॥ २०

त्रिविधं नरकस्येदं, द्वारं नाशनमात्मनः।

कामः क्रोधस्तथा लोभस्तस्मादेतत्त्रयं त्यजेत् ॥ २१

(नरक जाण के तीन दुरज्जे)

तीन तह्याँ का नरक लोक का, यो दरवज्जा नस्ट करणियाँ।  
तन मन इन्द्री बुद्धी का अर, उस मैं भासित जीवात्मा का ॥  
इच्छा गुस्सा लालच सैं जो, इन तीन दुरज्ज्याँ तैं लिकड्या।  
मन नाबूद करै माणस नै, इस कारण ये तीन्हुँ छोड्डै ॥  
(माणस नै खुद की खोज करी)

माणस तन के च्यार प्रयोजन, इच्छा मन की पूरी होवैं।  
तन नै मन नै सुख जो होवै, इस कै खात्तर जड़ अर चेतन ॥  
साधन जोडू सुखभोग करूँ, इन दोन्हुँ कै फन्ध्याँ मैं बँध।  
पतन कितै नाँ मेरा होवै, इस की खात्तर नियम व्यवस्था ॥  
प्रक्रिति नियम कै अनुकूल रहूँ, न्यूँ ए रहणा धारैगा अर।  
व्यस्टि समस्टी देस काल मैं, सामञ्जस्य रहै समरसता ॥

इसै भाव तैं देवतत्त्व की, बात मनुख कै मन मैं आई।  
उन नै कर कैँ अनुकूल यग्य तैं, जड़ अर चेतन साधन आप्णे ॥  
भोत जुटा कैँ विधि-विधान तैं, त्याग द्रव्य का उन की खात्तर ॥

कर कैँ सोच्या माणस नै था, व्यस्टि समस्टी का सुख पाणा ॥  
 यो सब पा कैँ सुखी मनुख हो, भोग्गाँ तँ हो त्रिस बिचारै ।  
 “पाया मन्नै, खोया के सै?, सै सार तत्व के हाथ लग्या?” ॥  
 व्यस्टि, समस्टी, सारी दुनियाँ, इस नै माणस खोज्जण चाल्ल्या ।  
 तिणकै-तिणकै खोल देख कैँ, पाया ओड़ न इस का कोए ॥  
 देक्ख्या सब-कुछ आणा-जाणा, सुख-दुख देक्खे आणे-जाणे ।  
 फिर बी दुनियाँ चाल्ली जा सै, कोण चलावणियाँ? सै कित वो? ॥  
 क्यूकर खोज्जूँ दुनियाँ मैं मैं? दुनियाँ का यो सार काढदै ।  
 ऋषि कणाद नै सात पदारथ, काढ बण्या जग उन तँ पाया ॥  
 इन मैं बी सै सूक्समतम अणु, वो बी देक्ख्या भाग-दोड़ मैं ।  
 उस तँ आगै नाँ वो फ्होँचे, साइँस लग्या सै उस्सै रस्तै ॥  
 ईब तई नाँ खोज सक्या सै, देस काल अर पिण्डाँ की थाह ।  
 इन कैँ ऊपर परम ततव सै, कोए कद वो खोज्जै गा के? ॥  
 श्गोतम रिसि नै माल्था मार्या, ‘तरक, जुगत तँ उस नै खोज्जूँ’ ।  
 कह नाँ पावैँ बडे बिग्यानी, आज बताऊँ किस तहियाँ मैं? ॥  
 जग चाल्लण मैं खास जरूरी, चेतन आत्मा खोज्ज्या उन नै ।  
 गुण बी उस मैं कई बताए, वो देक्खण ओर पिछाणन नै ॥  
 \*कपिल रिसी नै दुनिया परखी, तरक बिचारे, ओड न पाया ।  
 सात पदारथ तँ अर हट कैँ, पाँच भूत पै ए वँ आए ॥  
 उन का बी वँ मूळ खोजदे, त्रिगुणा प्रक्रिती ताँईँ पाँहचे ।  
 या बी पर थी जड़ ए, इस तँ, ऊपर उन नै पुरुस बिचार्या ॥  
 इन मैं बी सै कोण परम यो, निर्णैँ वँ बी नाँ कर पाए ।  
 \*पतञ्जली नै रस्ता काड्या, ब्रह्माण्ड र तन मैं फरक किमे नाँ ॥  
 बाहर जग मैं, भीतर तन मैं, जड़ अर चेतन एक जिसे सँ ।  
 भागैँ क्यूँ कस्तूरीमिग-सा? कर तँ माणस खोज भीतरै ॥

पाया उन नै चलदी-फिरदी, काया मैं मन प्रबल सबै पै ।  
 पहल्याँ मन नै रोक बाँध कैँ, पाया आनन्द समाधी मैं ॥  
 वा बी पर नित्य निरन्तर, हो नाँ सकदी, उस तँ उठ कैँ ।  
 अथवा जो नर कर नाँ पावैँ, उन कैँ खात्तर रस्ता खोज्ज्या ॥  
 \*सारे बेदाँ, सास्त्र पुराणाँ, मानव मन नै मथ कैँ भोतै ।  
 पुरुस ततव पै जोर लगा कैँ, ब्रह्म ततव तँ हो कैँ फिर वो ॥  
 परम ब्रह्म तक पाँहचे रिसि थे, जीव परम सै, परम जीव सै ।  
 समझ बताई रिसियाँ नै वा, जिस तँ छूटै सुख तँ दुख तँ ॥  
 दोन्नाँ देन्दे पुण्य पाप तँ, उन कैँ बीज करम तँ छूटै ।  
 करमाँ के मूळ जनम-मरण तँ, न्युँ मोक्स प्रयोजन परम कह्या ॥  
 जोग न रहणै देन्दा अर्जन, मन इन च्यारूँ पुरुसार्थों कैँ ।  
 इन तीन दुरज्ज्याँ तँ लिकड़्या, मन यो नाबूद करै माणस नै ।  
 इस कारण ये तीन्नाँ छोडै ॥ २१

एतिर्विमुक्तः कौन्तेय, तमोद्वारैस्त्रिभिर्नरः ।

आचरत्यात्मनः श्रेयस्, ततो याति परां गतिम् ॥ २२

(इन तँ बच कैँ परम गती हो)

आत्मदेव कैँ जोत रूप नै, ढँकणै आळे अँधियारे इन ।  
 तमोभाव के परम उधारण, तीन दुरज्ज्याँ तँ छूट्या नर ॥  
 करदा आपणा कल्ल्याण सही, उस तँ पावैँ सब तँ आच्छी ।  
 सदा खुसी मैं रहणै आळी, जीतै जी मन के सब सुख दुख ॥  
 उन तँ छूट्या जीवन्मुक्ती, तन नै तज कैँ ब्रह्म परम हो ।  
 जलम मरण कैँ चक्कर मैं, आवैँ सै नाँ माणस अर्जन ॥ २२

यः शास्त्रविधिमुत्सृज्य, वर्तते कामकारतः ।

न स सिद्धिमवाप्नोति, न सुखं न परां गतिम् ॥ २३

(सास्त्रबिधी तँ चलणा चाहिये)

१के सै करणा, २के नाँ करणा, ३किस तहियाँ करणा, नाँ करणा ।  
 ३सुख की प्राप्ती जिस तँ होवै, या बात बतावँ सँ सास्तर ॥  
 उन की बात परम या होवै, आदेस, प्रमाण, परम सासन ।  
 इन्हँ पढान्दे, इन्हँ बतान्दे, चाल्लण की अर राह सिखान्दे ॥  
 ग्रन्थाँ, गुरुआँ, आचार्याँ अर, सिस्टजनाँ की कही बिधी नै ।  
 तज कै चाल्लै मनमर्जी तँ, बिना रास कै घोड़ा चाल्लै ॥  
 रथ पै बैट्ट्यै सारथि, रथ की, होगी हालत जो, वा होगी ।  
 नाँ वो लक्स्य कदे बी पावै, जिन्दै सुख नाँ काया तज कै ।  
 परमगती नाँ माणस पावै ॥ २३

तस्माच्छास्त्रं प्रमाणं ते, कार्याकार्यव्यवस्थितौ ।

ज्ञात्वा शास्त्रविधानोक्तं, कर्म कर्तुमिहार्हसि ॥ २४

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां योगशास्त्रे  
 श्रीकृष्णार्जुनसंवादे दैवासुरसम्पद्विभागयोगो नाम षोडशोऽध्यायः ॥ १६ ॥  
 (अर्जन तँ दी सल्हा किसन नै)

इस लिये सास्त्र प्रमाण तन्नै, के किस बिध करणा, नाँ करणा ।  
 कद करणा, अर कद नाँ करणा, इस का निर्णै करणै मैं सै ॥  
 या बात बताणै मैं हौँ सँ, आचार्य गरू अर बड़ले बी ।  
 सास्त्रबिधी कै नीच्चै सारे, के करणा अर के नाँ करणा ॥  
 जाण-समझ इब सास्त्रबिधी तँ, कह्या करम सै तँ कर सकदा ।  
 अर्जन, कर ले निर्णै खुद तँ, लड़णा सै, या नाँ ए लड़णा ।  
 खड़ी फौज ये आम्हीं स्याम्हीं, बाट देख ह्री तेरी ए सँ ॥ २४

स्रीमती सीतादेब्बी अर स्रीस्रीनिवास सास्तरी कै बेट्टे सिवनारायण  
 सास्तरी कै हरियाणी भास्सा कै गीतायन काब्ब्यभास्स्य मैं

सोळहमाँ अद्ध्यय पूरा होया ॥ १६ ॥

पूर्वसलोकयोग ५५० + २४ = ५७४